

東

華

錄

東華錄

康熙八十六

臣王先謙敬編

臣周澗蕃恭校

秋七月辛未予勦辦峯崖山生番死事守備韓國元千總洪章高仲元官廕○庚辰調拉都渾爲理藩院左侍郎轉揆敘爲工部左侍郎以張額爲工部右侍郎

由左副都御史遷

○壬午兵部議覆奉差湖

南審事吏部尙書蕭永藻等奏巡撫趙申喬奏參提督俞益謨侵冒兵餉遊擊唐之夔將銀換錢少與多取總兵官李如松不能約束兵丁在任所開設典鋪提督俞益謨奏參巡撫趙申喬每事刻意苛求故欲陷人今將伊等審訊所參俱實俞益謨應革職原任總兵官今升杭州副都統李如松及唐之夔應各降三級調用趙申喬亦應革職得旨俞益謨著休致趙申喬著革職畱任李如松

著降三級從寬免調用畱副都統任餘依議○一等侍衛海青卒加贈副都統銜並賜鞍馬二匹內廐馬一匹散馬一匹銀一千兩及妝蟒段疋等物○丁亥刑部議覆左副都御史祖允圖奏參戶部內倉虧空草豆一案審據書辦胡文思沈遵泗供稱每年買賣人等所領銀兩有送堂司官公費其銀數帳目俱存買賣人金壁處隨傳問金壁取出康熙四十五六七八等年送堂司官銀數帳簿內開得銀之堂官希福納等司官根泰等共六十四員此等堂司官員俱應革職拏問尙書張鵬翮等無入己之贓但伊等家人有與買賣人要銀之處應否將伊等一併革職拏問請旨定奪得旨國家錢糧關係重大見今俱已發露必從設立監督之年稽察著此案內無名之九卿大臣官員公同秉公審理本身不會得銀家人得銀者免其革職拏問餘如議○戊子諭大學士等據刑部

摺奏戶部虧空辦買草豆銀兩一案干連甚眾大臣官員等不能
潔己革除積弊今事已敗露誠爲可恥朕昨覽此事終夜不寐反
復思維姑開以自新之路見在得贓人員於未審之前若將自身
所得之銀卽行賠完則免其革職拏問爾衙門卽將此旨驛發刑
部 上出行宮前諭扈從大臣官員等副都御史祖允圖爲戶部
內倉虧空買辦草豆銀兩事參劾希福納等共侵欺銀二十餘萬
朕以爲希福納年久能辦事故用之今已如此朕亦無如何也朕
反復思之終夜不寐若將伊等審問獲罪之人甚多矣今觀戶部
弊端始自尙書科爾坤佛倫後之諸臣皆循伊等所行以至於此
今予以自新之路暫停革職拏問凡爲大臣者理應廉潔自守黽
勉從事方無忝厥職也○庚寅增陝西武鄉試中額二十名
閏七月戊戌先是下嫁喀喇沁郡王噶爾臧額駙之和碩端靜公

主於本年三月薨逝 上命皇十三子允祥貝勒海善公鄂飛德

甯振衡等致祭至是禮部奏請遣官造墳立碑從之○辛丑以雍

泰爲山西布政使

任原

○己酉江蘇巡撫張伯行以江南藩庫賠補

虧空奏稿送江南江西總督噶禮會奏不俟噶禮咨覆卽行具奏

後噶禮發回奏稿並未畫奏於是張伯行具奏檢舉請罪 上諭

大學士等覽張伯行奏疏則伊等不和可知爲人臣者當以國事

爲重協心辦理今以不和之故於公事兩相矛盾可乎朕總理幾

務垂五十年凡事無不經歷似此違例專擅者朕未嘗令一人得

逞其私爾等將此本批知道了該部知道似此者但二三次置之

不問彼自覺無味漸就消融矣○庚戌下嫁喀爾喀額駙策凌之

和碩純愍公主薨逝造墳立碑如例○甲申 上行圍發熱河○

予浙江大嵐山死事都司張朝臣官廕○庚申諭九卿等自趙申

喬參俞益謨之後爲督撫者每每苛求武弁武弁非讀書之人但披堅執銳用命殺敵而已地方文武多有火耗銀兩武弁絕無所得然於兵丁能效力者必量加賞勸庶軍士盡皆鼓舞遇敵肯前若毫無賞勸何以使人樂爲之用乎昔人云重賞之下必有勇夫今文官生當太平但知以成法苛求武弁總不爲武弁一籌畫之昔三藩變時張勇王進寶趙良棟孫思克等勦力爲國埽除逆寇亦因朕倚任恩深帑餉繁多犒賞無缺故士卒聽其指麾用命效死乃能成功武弁雖不可縱之使驕亦不可摧之使弱我朝武弁歷來並未驕縱若挫辱之使氣漸頹則所關甚大總督殷泰係窮兵出身歷加擢用至西甯總兵官朕諭陝西督撫等助以銀兩犒賞士卒是以殷泰得展舒其志今湖廣提督員缺爾等知悉總兵官內有才守兼長者卽行舉出如總兵官內無人副將內設有之

亦行舉出副將內無人卽於文武官員內有確知其可用者亦行舉之

八月癸亥朔戶部議覆江蘇巡撫張伯行奏江蘇所屬州縣平糶賑濟等項錢糧數目未清查江蘇錢糧先經總督噶禮參原任布政使宜思恭虧空一案已經審明今何得又稱署布政使陳鵬年詳稱司庫尙有虧空一十六萬兩扣收無著應令該撫會同該督確查議奏得旨此事曾令張鵬翮審結今張伯行又奏未清錢糧數目甚多不敢容隱卽著原審大臣逐款審明定議具奏○乙亥諭戶部福建將軍祖良璧奏請福建泉州漳州等處被旱未收福建民多田少不可不急爲拯救雖總督梁鼎曾奏請借銀買米平價糶賣但所買米數不多且一時不能運至曩昔山東江南等處被災朕一聞知卽爲拯救天下人民皆朕赤子應卽遣部院大臣

會同江浙督撫截畱本年起運鎮江漕糧十萬石松江湖州漕糧各十萬石鎮江之糧運至狼山松江湖州之糧運至乍浦著福建督撫提鎮不拘一人率領福建戰船將運往狼山乍浦三十萬漕米轉運至福建賑濟被災人民務期均霑實惠雖此米不能速至而被災之民間朕此旨卽歡悅而定矣其泉州漳州今年未完錢糧亦著暫行停徵○庚辰裁浙江驛傳道其驛站事務歸浙江鹽法道兼理復設金衢嚴道○辛巳諭大學士等朕自卽位以來辦理軍務甚多向年平定三逆取臺灣降鄂羅斯討滅噶爾丹用兵之道朕知之甚明部院諸事朕尙與諸臣商酌之惟軍旅之事皆出自一心籌畫前於烏闡布通擊敗噶爾丹人言彼時天晚未獲全勦嗣後費揚古於昭莫多地方至傍晚時大敗噶爾丹殺賊竟夜以此觀之隨時遇見賊寇卽當擊殺豈可以日夕推諉而不奮

擊乎朕巡行塞北至烏闌布通觀我軍排列陣勢俱甚合節但噶爾丹乃行陣積年之賊於沙岡之下排列所以我軍火器俱高未獲盡勦後費揚古遵朕指示奮力擊殺始能勦滅今海內承平邊疆無事選擇武弁但視其步射騎射才堪管轄者用之而已其於行陣如何則無由知之也或有軀幹短小步射平常而善於行陣者或有相貌魁偉且善騎射而不善於行陣者必遇敵時方能知之耳凡人誠知顧惜顏面能效命者卽爲勇士原任正白旗副都統色格印善射且相貌魁偉善於管轄兵馬烏闌布通之戰彼則大懼故推受暑下馬其家人俱憤曰身爲二品大臣如此臨陣退怯歸去何顏見人耶扶之上馬色格印復下馬臥於草內及回營戰慄不已身披甲冑蒙被達旦因此伊所管兵丁無不恥笑內府員外郎喀青阿之父海西尼身小力微曾往福建隨征得本旗頭

等功牌八次雖身體數處被傷而攻城之時猶令人用木板舁之前往以觀攻城及城旣拔謂眾曰我因殘疾未獲與汝等一同效力憤恨大哭又原任巡撫楊熙亦甚瘦小醜陋當尙之信反叛時彼與海澄公之弟黃芳世拜音達禮俱在廣東城內被賊圍困三人各率家人殺出重圍往赴大兵營內以此觀之人之勇怯斷不可以相貌定也且三逆叛時李之芳曾任浙閩總督伊雖不諳騎射執刀立於船首率眾突前大破敵人以立功績彼時同出征者回京俱稱李之芳之勇近征紅苗提督李芳述親冒礮銃鼓眾力戰連破數寨聞趙申喬亦甚強毅又將軍穆占孫思克等在平涼時與賊大戰孫思克之手被賊砍中馬進良曾爲孫思克標下武弁聞之曰砍我總兵之手者吾必殺之遂突入萬軍中追殺砍孫思克手之賊馬進良數處中傷至今尙有傷痕可謂奇勇矣今承

平日久善於馬步射能管轄兵丁者尙不乏人若屢經行陣之人甚難得也野戰尙易水戰尤難蓋水戰必待迎風方出此特爲易退之計也或我兵欲出之日賊兵不出或賊兵欲出之日我兵不出彼此相遇甚難必能識水性諳水陣之人始可隨機應變調度成功先是海寇僞將劉國軒投誠授天津總兵官朕行水圍時問彼戰陣之事彼云曾與我兵戰七十餘陣皆敗朕問本朝兵丁何如彼云滿洲兵實精銳無敵但皆以強勇勝並未有一次得戰之理據地之利勝我也窺其意實乃稱揚我兵至若將軍大臣彼雖不明言頗有不足之狀大學士溫達奏曰滿洲兵丁遇敵惟知效命死戰稍有退避人皆恥之故所向無敵 上又諭曰朕用福建廣東人甚多福建人性獨好勇文人亦能舞籐牌挑刀彭鵬任三河縣時聞某處有賊卽跨刀親往擒賊今泉州歉收民皆困厄福

建之事爾諸臣最宜留心○甲申 上駐蹕博洛和屯賜來朝外藩銀幣鞍馬及隨圍蒙古官兵銀布○福建浙江總督梁鼎丁母憂命回籍守制○丙戌 上還駐熱河○庚寅以范時崇爲福建

浙江總督滿丕爲廣東巡撫

由內閣學士遷

九月甲午

上奉

皇太后自熱河回鑾○乙未諭大學士等吏

兵二部彙奏之事朕先屢經明諭應十日一次彙奏者卽於十日具奏應十五日一次彙奏者卽於十五日具奏今觀彙奏之事每遲延數月始行具奏彙奏事內有丁憂遷葬終養省親病老乞休等事皆有關員缺不可遲延此等有畱滯者著速行具奏○丙申諭戶部直隸各省抽分監督嗣後有奏請展限者永行禁止○辛丑 上奉 皇太后還京師○壬寅諭吏部福建巡撫許嗣興才力不能任事著解任福建巡撫著浙江巡撫黃秉中調補○丙午

以王度昭爲浙江巡撫

由戶部右侍郎遷

瓦爾答爲內閣學士

由內閣侍讀學士遷

○辛亥九卿等議奏臣等遵旨查自康熙三十四年戶部設立辦買草豆監督起至康熙四十四年止據買賣人金璧等供稱得銀之堂官共一百十二人共侵蝕銀四十四萬餘兩並前查出康熙四十五六七八等年希福納等侵蝕二十萬餘兩均應勒限賠完免其議處 上諭大學士等凡事有罪雖大而情可恕者有罪雖小而情不可恕者卽如督撫居官清廉則屬員交相效法皆爲良吏部院衙門實爲本原之地希福納身爲大臣操守不能清廉豈可恕耶希福納卽著革職餘如議○兵部議覆太原總兵官馬見伯奏武經七書註解互異請選定一部頒行又祭 先師孔子時自驛丞以上官員皆得陪祭武臣惟副將以上方准陪祭請將武臣亦照文臣一體行禮俱不准行 上諭大學士等此本亦是武

經七書朕俱閱過其書甚雜未必皆合於正所言火攻水戰皆是虛文若依其言行之斷無勝理且有符呪占驗風雲等說適足啟小人邪心昔平三逆取臺灣平定蒙古朕料理軍務甚多亦曾親身征討深知用兵之道七書之言豈可全用孟子云仁者無敵又云天時不如地利地利不如人和今日若欲另纂一書而此時又非修武書之時李光地奏曰令習武者讀左傳卽佳上曰左傳浮夸昔人曾議之孟子有言可使制梃以撻秦楚之堅甲利兵矣若知此意而用兵方是總之仁者無敵此是王道與其用權謀詐僞無稽之言不若行王道則不戰而敵兵自敗王道二字卽是極妙兵法從古窮兵黷武皆非美事善戰者皆時至事迫不得已而後用兵也昔吳三桂反時江南徽州所屬叛去一縣將軍額楚往征之有人獻策於賊云滿洲不能步戰若令人誘至稻田中卽可

勝之矣豈知滿洲兵強勇爭先未及稻田已將誘者盡殺之此獻
策之人亦爲我兵所殺用武經七書之人皆是此類今於武經七
書內作何分別出題及論語孟子一併出題之處著九卿定議具
奏嗣後祭先師孔子時令武臣與文臣一體行禮於理甚合著
照馬見伯所請行○諭大學士等奉天將軍嵩祝奏錦州邊海之
處有洋賊二百餘人上岸搶劫經防禦官兵殺死洋賊三十六人
擒獲一人詢知賊首鄭盡心係浙江甯波府人見今冬季遇北風
餘賊敗遁者必乘風自東南竄去一至山東江南又必行劫恐山
東江南兵不能追殺舟師出大洋中不遇南風卽難回汛畧有疏
虞關繫非小此番之賊原欲劫糧因巡哨丁弁奮勇力殺故皆敗
走總之洋賊惟仗行劫地方官實心防禦使洋賊不得行劫則船
中無糧必自飢餓而死矣○丙辰予故理藩院右侍郎薦良祭葬

○己未諭戶部陝西州縣官有因地瘠民貧並不虧空錢糧故爲虧空被參解任後卽行填補希圖別處美缺者朕知之甚確著九卿議奏尋議嗣後直省州縣虧空錢糧被參離任後賠補已完開復者不准別省補用仍以原缺補用庶無規避之弊從之○辛酉轉穆和倫爲戶部尙書以貝和諾爲禮部尙書

由雲南貴州總督遷

冬十月甲子諭戶部朕恭膺 天眷祇承 列祖鴻庥統御萬方子育兆庶庶懷至治宵旰靡甯幸際海宇同風邊隅嚮化遐邇中外帖然衽席之安是皆仰荷 天地 祖宗福佑之所致也方朕入齡踐阼之初 太皇太后問朕何欲朕對臣無他欲惟願天下治安生民樂業共享太平之福而已迄今五十年矣惓惓此心未嘗一日少釋每思民爲邦本勤恤爲先政在養民蠲租爲急數十年以來除水旱災傷例應豁免外其直省錢糧次第通蠲一年屢

經舉行更有一年蠲及數省一省連蠲數年者前後蠲除之數據戶部奏稱共計已逾萬萬朕一無所顧惜百姓足君孰與不足朝廷恩澤不施及於百姓將安施乎朕每歲供御所需概從儉約各項奏銷浮冒亦漸次清釐外無師旅饗饋之煩內無工役興作之費因以歷年節省之儲蓄爲頻歲渙解之恩膏朕之蠲免履行而無國計不足之慮亦恃此經籌之有素也比來省方時邁已歷七省南北人民風俗及日用生計靡不周知而民生所以未盡殷阜者良由承平旣久戶口日蕃地不加增產不加益食用不給理有必然朕洞矚此隱時深軫念爰不靳敷仁用甦民力明年爲康熙五十年思再沛大恩以及吾民將天下錢糧一概蠲免因眾大臣議奏恐各處需用兵餉撥解之際兵民驛遞益致煩苦朕因細加籌畫自明年始於三年以內通免一周俾遠近均霑德澤直隸奉

天浙江福建廣東廣西四川雲南貴州所屬除漕項錢糧外康熙五十年應徵地畝銀共七百二十二萬六千七百兩有奇應徵人丁銀共一百一十五萬一千兩有奇俱著察明全免並歷年舊欠共一百一十八萬五千四百兩有奇亦俱著免徵其五十一年五十二年應蠲省分至期候旨行民間舊欠既經豁免嗣後每年額徵錢糧務如數全完蠲完不及額或別有虧空託稱民欠則負國甚矣卽責令督撫以下官員償補仍從重治罪夫地方大吏以及監司守令皆與吾民誼均休戚者也誠克體朕孳孳保赤之懷實心愛養力杜侵牟朘削則閭閻咸得衣食滋殖無有失所而爲官吏者亦身名俱泰豈非昇平樂利之盛事歟爾部移文各督撫諭旨到日卽刊刻頒布徧示窮簷令咸知悉特諭○丁卯諭理藩院每年蒙古王貝勒貝子公台吉等朝正來京向有成例但今年行

圍處其已經來朝者念道里遙遠免其重至京師以稱朕格外優恤之意○戊辰以施世綸爲戶部右侍郎由左副都御史遷○庚午九卿

等議覆太原總兵官馬見伯奏武經七書請揀選頒行查武經七書惟孫子吳子及司馬法議論近正嗣後考試武生武童論二篇

一題出論語孟子一題出孫子吳子及司馬法舊例鄉會試論一篇策二篇今改出論題二策題一從之○癸酉戶部左侍郎赫申

以病乞休允之○甲戌以李仲極爲內閣學士由內閣侍讀學士遷○丙子以郭璫爲雲南貴州總督吳存禮爲雲南巡撫由陝西巡撫遷○以郭

世隆爲刑部尙書鄂海爲湖廣總督由陝西巡撫遷○以左必蕃爲左副都御史由宗人府府丞遷○辛巳轉塔進泰爲戶部左侍郎以鄂奇爲戶

部右侍郎由甘肅巡撫遷○癸未諭大學士九卿等江南虧空錢糧兩次命張鵬翮察審朕意地方雖有不肖之官侵蝕錢糧未必多至數

十萬兩前朕南巡時曾有諭旨凡沿途所用之物悉出內帑豫備未嘗絲毫取諸官民督撫等官不遵朕旨肆意那用以致虧空朕若不言內外諸臣誰敢言者但彼任事之人離任者已多若將因公那用等項責之新任官賠補朕心實不忍也問張鵬翮曰爾往江南訊問此事地方官有言及南巡者乎張鵬翮奏曰地方官員願將俸工逐年扣除以補諸項虧空並未言及南巡之事上曰

俸工銀兩有限卽逐年扣補亦難清理且官無俸祿役無工食必

至私派以累民依爾所言能保地方官日後不累民乎朕爲天下

生民計豁免各省錢糧已逾萬萬矣免此四五十萬之銀有何足

惜爾等會議具奏○以雍泰爲陝西巡撫

由山西布政使遷

樂拜爲甘肅

巡撫

自陝西布政使遷

○乙酉戶部議覆直隸巡撫趙宏燮等奏臣等遵

旨查勘原任天津總兵官藍理開墾水田一百五十頃令天津參

將藍珠料理接種但水田一百五十頃內有窪地五十頃時被水浸不便耕種又有高地五十頃不宜種稻止種收雜糧供給農工其可作水田種稻者止五十頃康熙四十八年內藍珠所種稻穀據報收二千五百餘石至高窪不等之田地旱澇難於蓄洩所以五十頃水田不便安設官屯查此項開墾水田前經差內務府總管黑碩子侍郎穆丹等往勘據奏藍理開墾之田其洩水處淺而且狹見在田地俱被水浸應將洩水之處挑濬設閘使一百五十頃俱可耕種試種一二年果否有益令該巡撫查明具奏今一百五十頃內止種有五十頃稻田一年之內見經收穫二千五百餘石其餘田地並未曾全種遠稱不便安設官屯難以定議應行文該巡撫照原勘黑碩子等所奏將洩水之處挑濬設閘使一百五十頃水田盡令種稻驗明收穫多寡具奏到日再議得旨此開墾

田地著交與趙宏燮有情願耕種人民撥與耕種○戊子諭大學士九卿等前命張鵬翮察辦江南虧空曾諭爾等查議已查明否爾等主意若何大學士等奏曰臣等尙未商酌未有主見上曰此項虧空據稱因公挪用係何公事未經明晰張鵬翮奏曰大概如賑濟平糶以及修塘等事上曰朕總理幾務垂五十年事無大小凡臣下隱情無不灼知洞鑒朕屢次南巡地方官豫備繕夫修理橋梁開濬河道想皆借用帑銀原冀陸續補足而三次南巡爲期相隔不遠且值蠲免災荒所徵錢糧爲數又少填補不足遂致虧空如此之多爾等皆知之而不敢言也張鵬翮奏曰皇上屢次南巡必大沛恩膏於百姓所至之地小民無不歡欣鼓舞至於一切供億悉內府儲備從無絲毫累及民間上曰卽如繕夫一項需用旣多伺候日久勢必給與口糧工價安得無費至於修

造行宮必然亦借用帑銀前者朕巡視漕淮套工程至彼處見有舍宇三間此係取用何項張鵬翮奏曰係俸工銀兩所造 上曰雖云俸工銀兩所造然必先借用庫銀後方抵補爾等豈肯明言其故乎今合計江南虧空共有幾何張鵬翮奏曰約計共五十餘萬于準宜思恭應賠十六萬其餘將俸工抵補至康熙五十三年可補足矣 上曰三年之內地方官員或升遷或調用或革退或亡故以前各官那用虧空而將後來之俸扣補於理不順朕心實爲不忍至於胥吏賤役若不給與工食此輩何所資生必致累民今部中每遇一事輒議令地方官設法料理皆修飾美名實則加派於地方也張鵬翮奏曰 皇上聖明無微不照所以養育百姓者至深至渥 上曰朕非但爲百姓亦爲大小諸臣保全身家性命也朕南巡時聞龍潭地方建造行宮恐致累民曾諭總督阿山

令其拆毀至他處建造行宮朕皆未之知也總之此不欲累民之
念可以自信亦可見信於天下後世朕歷年蠲免天下錢糧至數
萬萬兩有餘今此項虧空若令補墊亦不爲多然豈忍以此累地
方乎至於查明款項亦非難事錢糧冊籍皆有可考地方官借因
公那用之名盈千累百餽送於人若加嚴訊隱情無不畢露也朕
意概從寬典更不深求今海宇昇平國用充足朕躬行節儉宮中
用度甚爲省約計明朝一日之用足供朕一月之需今卽因數次
巡幸用錢糧四五十萬亦不爲過明後年天下錢糧以次盡行蠲
免若畱此虧空之項以爲官民之累甚非朕寬仁愛養嘉與維新
之至意爾等可公同詳議具奏○乙丑以宋致爲四川布政使

福建按察使遷

十一月辛卯朔給事中高遐昌奏凡遇蠲免錢糧之年請將佃戶

田租亦酌量蠲免著爲例 上諭大學士等豁免錢糧但及業主

而佃戶不得沾恩伊等田租亦應稍寬但山東江南田畝多令佃

戶耕種牛種皆出自業主若免租過多又虧業主必均平無偏乃

爲有益此本著交部議尋戶部議覆嗣後凡遇豁免錢糧合計分

數業主蠲免七分佃戶蠲免三分永著爲例從之○甲午以查林

布爲山西布政使由郎中遷覺羅額倫布爲陝西布政使由給事中遷○丙

申諭大學士等朕觀滿洲蒙古人甚爲淳樸易於豢養卽如今歲

遣大臣會盟蒙古竟無一事昔皆三年一會盟今五年始一會盟

而尙無一事大學士等奏曰此皆 皇上盛德所感被也○禮部

尙書許汝霖以老乞休允之○庚子 上問大學士九卿等曰張

鵬翮所審江南虧空一案爾等所議若何大學士等奏曰臣等議

行文督撫徹底清查 上曰行查誠是但虧空之由皆因南巡費

用所致若不聲明反屬不宜朕之巡幸原以爲民無庸隱諱即用帑百萬亦所當然著將朕諭旨全行鈔錄行該督撫令查南巡時所用數目但舉其大畧而已至於俸工扣補三年之內雖可全完然必至派累百姓斷不允行○四川提督岳昇龍奏臣遵旨率領官兵進剿生番於閏七月內擒獲賊首羅都等交撫臣年羹堯審擬其瓦都月落口等處生番俱已投誠惟瓦尾白宿等處生番倚恃險阻潛匿不出臣徧行搜探相機一併剿撫 上諭大學士等岳昇龍效力殊屬可嘉巡撫年羹堯係與提督岳昇龍同往剿撫之人乃畏避不行前往著明白回奏○大學士陳廷敬以老乞休溫旨慰諭命原官致仕○以董永茂爲福建按察使

由江西贛南道遷

○

辛丑戶部議覆奉差江南審事戶部尙書張鵬翮奏江甯等府屬虧空銀兩已議扣康熙四十八年至康熙五十三年各屬俸工等

銀抵補內有四萬七千五百餘兩原係有著之項蘇州知府陳鵬年署布政使時造入無著數內殊屬不合應將陳鵬年革任充發黑龍江但臣等見奉南巡時修理行宮豫備緯夫或動用帑銀不准俸工抵補之旨應俟該督撫查明南巡時實在動用數目具奏到日再議其議處陳鵬年之處亦俟奏到日再議從之○癸卯轉王揆爲禮部尙書由兵部轉以徐元正爲工部尙書由左都御史遷瓦爾答爲左副都御史由內閣學士遷○甲辰調施世綸爲倉場侍郎石文桂爲戶部右侍郎○乙巳 上謁 陵啟鑒○以蕭永藻爲文華殿大學士由吏部尙書遷○丙午以楊宗義爲安徽按察使由山西雁平道遷○丁未以孫徵灝爲兵部尙書由都統遷覺和托爲內閣學士由內閣侍讀學士遷○壬子 上謁 暫安奉殿 孝陵至 仁孝皇后 孝昭皇后 孝懿皇后陵奠酒○命恆親王允祺瀋郡王允祐至裕親王純親王墓

奠酒○乙卯以桑額爲吏部尙書

由漕運總督遷

十二月戊辰兵部議覆海澄公黃應纘奏伊父黃芳泰以京口總兵官承襲公爵已故二十餘年尙未營葬懇賜卹典應行文該督查明奏到再議 上諭大學士等平定三逆之事朕知之甚明黃應纘之祖黃梧 世祖章皇帝時曾遣人令伊投降因海寇鄭芝龍遺書阻之故黃梧未降後鄭芝龍之子鄭成功寇鎮江瓜洲貝子羅託總兵官梁化鳳內外夾攻大破之餘賊敗北投黃梧黃梧遂獻海澄縣歸順因封爲海澄公黃梧故後公爵與伊子黃芳度承襲黃梧之弟有二子長子黃芳世次子黃芳泰黃芳世自一等侍衛授廣東總兵官耿精忠叛時黃芳度堅守漳州府舉家被害黃芳泰逃至廣東請兵值尙之信叛黃芳泰同伊兄黃芳世巡撫楊熙力戰而出黃芳泰等實心效力所立功績部中亦有檔案不

必行查卽著該部查明議奏尋兵部奏黃芳度於逆賊耿精忠叛時舉家殉難黃芳泰突圍請援引兵入閩恢復地方應將黃芳泰賜卹之處交禮部從之尋贈太子少保子祭葬○庚午 上駐蹕

熱河賜隨圍蒙古官兵銀布○癸酉以赫壽爲漕運總督

由吏部左侍郎

遷○戊寅 上還京師○庚辰河道總督趙世顯奏御壩西壩工

程請修築加長繪圖進呈 上諭大學士等御壩西壩關係緊要

甲子年朕南巡時清流不暢黃水倒灌以致洪澤湖上流淤墊朕指修御壩西壩清水遂暢然流出黃水不至倒灌淮黃交會之區始得安瀾但其地甚卑溼彼時朕步行閱視十餘里泥濘沒膝指授方畧總之治水如治天下得其道則治不可用巧妄行靳輔善於治河惟用人力于成龍心計太過張鵬翮但遵舊守成而已張鵬翮係漢人豈能乘騎在在馳驅料理惟於朕諭遵行不違是以

河工底績耳今御壩西壩加長工程俱如所請令及時興工修築
○辛巳諭吏部朕每因朝列舊臣漸次衰謝時切軫懷特命內閣
查順治年間進士罷職在籍者已無多人其王士正江皋周敏政
葉矯然徐淑嘉宋慶遠皆以公事呈誤屏廢里居今年臻耄耄深
可憫念著復還原職以示朕格外加恩至意○以趙申喬爲左都
御史由偏沅巡撫遷○是月免直隸霸州大城等六州縣江南舒城縣被
災額賦有差○是歲朝鮮安南來貢○人丁戶口二千三百三十
一萬一千二百三十六田地山蕩畦地六百六十三萬一千一百
三十二頃二十四畝有奇徵銀二千九百二十萬二千五百四十
二兩有奇米豆麥六百九十一萬二千二百五十四石有奇草三
百五十二萬一千二百四十七束茶十八萬二千五百十七引行
鹽四百九十一萬五千八百七十五引徵課銀三百三十五萬一

東華錄

康熙八十六

五

千三百四十八兩有奇鑄錢二萬九千七百九十六萬三千四百有奇

東華錄

臣王先謙敬

臣周淪蕃恭校

康熙五十年辛卯春正月庚子 皇子允禧生○己酉轉哈山爲

吏部左侍郎調傅紳爲吏部右侍郎由盛京轉二高爲禮部左侍

郎以馮忠爲禮部右侍郎由副都統遷○庚戌以王朝恩爲偏沅按察

使由湖南衡永郴道遷○辛亥以潘宗洛爲偏沅巡撫由內閣學士遷○癸丑 上

巡視通州河隄啟鑾○以色爾圖爲盛京兵部侍郎由內閣學士遷○丁

巳以博音岱爲內閣學士由內閣侍讀學士遷○戊午以胡作梅爲內閣學

士由少詹事遷○丁卯 上閱匡兒港減水壩諭監修河工主事牛鈕

曰引河前崖應建一挑水壩減水壩之前亦建一挑水壩或長三

丈或長四丈其高應與舊挑水壩相等○戊辰諭監修河工主事

牛鈕曰三里淺之二挑水壩偏在上流朕已釘椿處再添一挑水壩或長三丈或長四丈高與隄相等 上自和韶屯乘舟閱河至河西務登岸諭監修河工主事牛鈕曰它河不礙村落方善若從此它去恐於村落有礙因步行二里許指示曰此沙地著它河寬十丈長四百七十餘丈平坦處深四五尺高阜處或七八九尺不等其河灣處著建二小挑水壩一長二十丈一長十丈其高與岸相等於是取儀器插地上令將豹尾槍縱橫豎立 上親視儀器定方向命諸皇子大臣等分釘椿木以紀丈量之處又於尾處立黃蓋以爲標準取方形儀盤置於膝上以尺度量用鍼畫記硃筆點之算畢令從尾處丈量至所插儀器處其丈尺與所算之數些微不爽因諭諸皇子大臣等曰用此可以測量天地推算日月交食至此等微事算之甚易因令大學士溫達等及直隸巡撫趙宏

變至前諭趙宏燮曰爾爲巡撫丈量田地不可不知朕將大概示爾知之於是量繩二丈以五尺各爲一面按定四角指示曰辟如此一區四面各稱丈量之畝數俱與繩數相符但地有大牙相入勢不能如此丈量者則丈量之人必任意折丈欺誑有破此弊之法惟從中橫量一繩而畝數卽出彼技無所施矣丈量田地關繫甚大天下隱匿田地亦不少但不可按剔耳夫算法之理皆出自易經卽西洋算法亦善原係中國算法彼稱爲阿爾朱巴爾阿爾朱巴爾者傳自東方之謂也凡有推算七九之奇數不能盡悉十二二十四之偶數方能盡之此皆體象十二時二十四氣也復取矢畫地作數圈示諸皇子大臣曰此卽定位之理雖千萬品類不能出此今凡物若干幾人應得若干之數用此頃刻可得卽推而至於聲音之高下亦可測而知也○諭大學士等河務甚難朕昔

因窆子牙河親身往視有大城武清縣民跪於兩岸互相爭訴朕慰之曰爾等勿得爭競朕自有處置之法因一一指授監修官員而回後河工告成於兩處百姓皆有裨益前張鵬翮任總河時來陛見朕訓之曰爾於河工不可任意從事但守成規遵奉朕訓而行及修御壩之時朕親身指授釘樁張鵬翮遵朕指授修建自此壩告成清黃二水始會流入海矣黃河水性善於更移朕幸甯夏時由黃河行二十一日至湖灘河朔因邊外無修治之人故黃河處處更移視水性每向南流北岸尚可南岸多被衝決古時黃水由天津碣石而流此言載在書經禹貢後又移流在德州自後漸移於南方矣治河固宜順水性亦在隨宜調度今使諸水入大海者豈盡隨水性哉○庚午 上還京師○吏部右侍郎仇兆鰲以病乞休允之○丁丑以陳元龍爲吏部右侍郎

由掌院學士遷

○庚辰以

韋園布爲陝西布政使

由宗人府理事官遷

○辛巳

上御經筵諭大學士

等曰從來經筵之設皆帝王留心學問勤求治理之意但當期有實益不可止飾虛文朕觀前代講筵人主惟端拱而聽默無一言如此則雖人主不諳文義臣下亦無由而知之若明萬厯天啟之時何嘗不舉行經筵特存其名耳何裨實用朕御極五十年聽政之暇勤覽書籍凡四書五經通鑑性理等書俱經研究每儒臣逐日進講朕輒先爲講解一過遇有一句可疑一字未協之處亦卽與諸臣反復討論期於義理貫通而後已蓋經筵本係大典舉行之時不可以具文視也○癸未刑部左侍郎魏齊以老病乞休允之○乙酉以吳一蜚爲戶部右侍郎

由太常寺卿遷

○是月免直隸慶雲縣上年水災額賦有差

三月庚寅朔諭大學士等內閣翻譯通本事甚緊要如一二語不

符漢文則於事之輕重大有關繫內閣侍讀學士及侍讀官員俱係按俸補授之人恐所翻本章不甚妥當在內廷行走之和素徐元夢雖係革職之員見今學翻譯者無能過之將和素徐元夢補授額外侍讀學士翻譯本章○諭督撫大吏辦事當於大者體察不可刻意苛求寬則得眾信則民任焉治天下之道以寬爲本若吹毛求疵天下人安得全無過失者趙申喬任浙江巡撫時民多怨之後任湖南巡撫大小官員無不被參豈一省之內無一好官耶總之爲大臣者不可輕率參人明時臣工不能秉公顛倒是非挾讎彈劾此風不可不戒夫官之清廉止可論其大者今張鵬翮居官甚清在山東兗州爲官時亦曾受人規例張伯行居官亦清但其刻書甚多刻一部書非千金不得此皆從何處來者此等處亦不必究兩淮鹽差官員送人禮物朕非不知亦不追求蓋惟愚

民爲不可欺居官之善與不善到任不過數月人卽知之故曰天視自我民視天聽自我民聽民意卽天意也又諭漢人雖有師生之名仍好互相結讎若平日稍有不合必尋求其過失陷之如或不能卽作爲文章極論其非以抒其情而後快此漢人陋習至今尙未改也○諸王公大小官員及生監百姓等以萬壽節請上尊號得旨朕自幼讀書歷觀經史持身務以誠敬爲本治天下務以寬仁爲尙此心此念恪守五十年夙夜無閒卽纖悉細務不敢稍有怠忽嘗觀古昔帝王君臨天下之久能持終者蓋鮮朕今春秋漸高血氣漸衰而朝乾夕惕實與日加增正當恪慎保終孜孜爲萬姓圖治安之時也蓋朕之御極年久皆祖宗厚德景福積累畱貽之所致至於請上尊號特虛文耳於朕躬毫無裨益史書所載加上尊號等事徒爲先儒所譏有何善處而欲行之這所

奏知道了○壬辰諭兵部朕於水陸兵丁調用年久深悉其情事

船出海洋必俟風候若不察風候而強行之必致兵船損壞官兵

係朕歷年養育之人遇賊自應效死如無賊而徒以巡哨受傷實

屬可惜凡提鎮等官當於此畱意務加謹慎○乙未轉牛祜納爲

刑部左侍郎以覺羅法喇爲刑部右侍郎由一等侍衛遷○丁酉以巴顏

杜爲內閣學士由內閣侍讀學士遷○戊戌以薩睦哈爲陝西按察使由郎中遷

○庚子羣臣請上萬壽節御殿受賀從之○壬寅以殷特布爲

左都御史由兵部左侍郎遷○丁未萬壽節上朝皇太后御殿受

朝賀停止筵宴○乙卯偏沅巡撫潘宗洛請訓上諭凡爲督撫

者操守甚爲緊要爾宜潔己爲下屬表率今天下太平無事以不

生事爲貴興一利卽生一弊古人云多事不如少事職此意也馭

下宜寬寬則得眾爲大吏者若偏執己見過於苛求則下屬何以

克當至於紅苗處在荒隅不得與內地百姓同視宜善爲撫綏朕
觀爾等漢官一遇難事便欲告退夫設官分職原欲令其甯謐地
方撫養百姓旣爲封疆大臣凡事宜一己擔當勉效力一遇難
事卽圖脫卸可乎○以薩爾臺爲內閣學士由內閣侍讀學士遷○工部尙
書徐元正乞請終養允之

夏四月庚申以節候漸炎諭刑部察絞罪繫獄者並議減等○以

陳詵爲工部尙書

由湖廣巡撫遷

○轉陳元龍爲吏部左侍郎調吳一蜚

爲吏部右侍郎

由戶部右調

滿篤爲兵部左侍郎調鄂奇爲兵部右侍

郎以噶敏圖爲戶部右侍郎

由內閣學士遷

○癸亥諭大學士等李光地

病尙未平復大抵皆溼熱所成服溫補之藥所致朕從前歲病後
乃知溫補之藥大非平人所宜醫必深明乎此然後可無錯誤不
然徒增益其疾耳又諭張玉書曰朕所纂輯朱子書見在李光地

處校勘彼既有疾汝可閱之此是極切實緊要之書須隨得隨刻
亟令告成○甲子四川提督岳昇龍奏臣率官兵往剿瓦尾白宿
等處生番斬殺七十餘人擒獲男婦子女一百四十餘名諸蠻情
願投降下部知之○乙丑以李仲極爲戶部右侍郎由內閣學士遷○戊
辰增直隸各省鄉試中額順天生員十八名南北監生十三名滿
洲蒙古四名漢軍二名江南浙江湖廣各十六名福建十四名江
西十五名山東河南各十二名山西陝西各十名廣東四川各十
一名廣西八名雲南九名貴州六名著爲令○庚午以宗紳保爲
內閣學士由內閣侍讀學士遷○甲戌諭大學士等朱子全書凡天文地理
樂律厯數俱非泛論皆能確見其所以然之故朕常細加尋繹欲
求毫釐之差亦不可得卽如徑一圍三畸零之數講論已自通徹
尙有畱待後人參考之語其虛心不自是如此黃鐘之管朕曾試

過葭管飛灰未經候驗但南北地形高下不同一時難於定準今

如暢春園距京城觀星臺地形便微有不同至於各省或同此一

時未必同此一刻矣○以劉殿衡爲湖廣巡撫原任○乙亥贈四川

陣亡參將周玉麟官廕○戊寅吏部議覆四川巡撫年羹堯奉旨

勦撫番人並未前往今回奏稱因提臣岳昇龍將生番之首惡羅

都等三人已經拏獲臣故中道回署自行認罪應將年羹堯照規

避例革職得旨年羹堯著革職從寬畱任○己卯以鄒士璉爲內

閣學士由左僉都御史遷○庚辰 上奉 皇太后避暑塞外啟鑾

五月己丑朔 上駐蹕熱河○癸巳吏部議覆甘肅巡撫樂拜奏

狄道縣知縣王鈞控告原任巡撫今升兵部右侍郎鄂奇及臨洮

道衛英等受伊節禮款項甚多請解任確審應將鄂奇等暫令解

任發往陝西質審 上曰鄂奇原係一無定之人因總督殷泰薦

舉朕試行擢用自任巡撫以來所奏之事俱不可信鄂奇著革職鎖拏遣司官一員解送陝西該督嚴行質審定擬具奏恐殷泰以爲己所薦之人瞻徇庇護亦未可定將朕旨明白發去令其從公審理○諭大學士等天上度數俱與地之寬大脗合以周時之尺算之天上一度卽有地下二百五十里以今時之尺算之天上一度卽有地下二百里自古以來繪輿圖者俱不依照天上之度數以推算地理之遠近故差誤者多朕前特差能算善畫之人將東北一帶山川地理俱照天上度數推算詳加繪圖視之混同江自長白山後流出由船廠打牲烏喇向東北流會於黑龍江入海此皆係中國地方鴨綠江自長白山東南流出向西南而往由鳳凰城朝鮮國義州兩閒流入於海鴨綠江之西北係中國地方江之東南係朝鮮地方以江爲界土門江自長白山東邊流出向東南

流入於海土門江西南係朝鮮地方江之東北係中國地方亦以江爲界此處俱已明白但鴨綠江土門江二江之間地方知之不明前遣部員二人往鳳凰城會審朝鮮人李玩枝事又派出打牲烏喇總管穆克登同往伊等請訓旨時朕曾密諭云爾等此去並可查看地方同朝鮮官沿江而上如中國所屬地方可行卽同朝鮮官在中國所屬地方行或中國所屬地方有阻隔不通處爾等俱在朝鮮地方行乘此便至極盡處詳加閱視務將邊界查明來奏想伊等已由彼起程前往矣此番地方情形庶得明白○乙未以旱命禮部祈雨○丙申諭大學士等將朕手書諭旨發往京城令會集大學士九卿詹事科道官詳晰傳諭伊等有應陳奏之事各自親書奏摺卽當九卿前交明具奏朕自京師抱恙而出今尙需人扶掖而行又兼天時亢旱早夜焦勞以致不安寢食自古君

臣之義甚重必上下一德相成然後能感上天之心召致和氣不在徒飾虛文務空名以從事也今當此亢旱之際我君臣應夙夜靡甯以爲萬民籌畫生計大抵諸臣內實心以國家爲念者固自不少而秉性奸惡亦不可謂無人惟爾諸臣宜仰體朕懷日存憂惕爲羣黎竭誠祈禱庶幾甘霖可冀早沛也○丁酉諭大學士等朕觀比來亢旱漸甚雖朕躬尙未大安猶可勉強起行正值亢旱之際處此清涼之地於心不安朕欲急速還京著行在諸臣速議具奏○扈從大學士等奏自四月微旱以來皇上卽降諭旨清察刑獄減免罪人又訓飭大小臣僚竭誠齋戒祈禱雨澤出京以後猶復傳諭再三皇上夙夜焦勞無一時一事不以羣生爲念在京在外無異視也今聖躬方覺少安寢食尙須調攝冒此酷暑遠行數百里所關甚重斷斷不可臣等激切懇求請留聖

駕奏入留中○己亥雨○庚子大雨○辛丑以覺和托爲兵部右

侍郎

由內閣學士遷

○予故吏部左侍郎曹鑑倫祭葬致仕內閣學士徐

秉義祭○丙午文華殿大學士張玉書卒

上命大學士溫達會

同翰林部院官員內務府總管往弔料理照漢禮衣殮賜銀一千

兩予祭葬加祭一次諡文貞○丁未諭大學士等朕自幼讀書見

大臣多不能保其初終故立志待大臣如手足不論滿漢蒙古非

大奸大惡法不可容者皆務保全之五十年來如大學士蔣赫德

衛周祚李蔚杜立德馮溥黃機吳正治王熙李之芳宋德宜梁清

標李天馥張英熊賜履吳璵陳廷敬皆以年老告辭林下怡養保

全名節朕亦未嘗少忘常使人存問始終如此凡在朝諸臣朕待

之甚厚伊等亦矢忠盡力歷數十年之久與朕同鬢髮皤然矣朕

念宿學老臣辭世者辭世告退者告退每每傷心痛哭今又有大

學士張玉書之事朕悲悼不已故援筆作輓詩一首令爾等知之
○已酉刑部等衙門奏福建海賊鄭盡心浙江海賊蔡元良山東
海賊張景龍等俱擬卽行正法奉旨此案正法人犯五十餘名人
數甚多朕心殊屬不忍鄭盡心並未與官兵抗拒不過迫於飢寒
搶奪財物聞鄭盡心等漢仗俱好且俱係熟諳水性之人今將伊
等從寬免死或歸併旗下或發往盛京烏喇等處爲水手當差著
問九卿詹事科道以聞尋九卿等議奏鄭盡心等應免死發黑龍
江甯古塔等處充水手當差得旨依議著問鄭盡心伊等人內有
能遠視善水善舞藤牌挑刀者爾等揀選四五人遣一司官送至
熱河○諭大學士等朕總理幾務年久閱本甚速凡一應奏摺及
綠頭牌頃刻卽能徧閱前尙書穆和倫數次奏事意朕未加詳閱
復行奏請朕將事內緣由指明穆和倫乃默然無語而退且朕閱

事不止於速凡一經目者斷不遺忘一應奏章及彙奏案件皆無不詳閱有差譌字句朕必以硃筆更改發出○諭戶部江蘇巡撫張伯行奏江蘇等府州縣無著錢糧十萬八千兩有奇此項錢糧朕知之甚悉係地方官因公動用未敢申明之項若著落後任官員賠補必致科派擾害百姓朕殊不忍著將此項錢糧免其賠補以示朕軫恤官民至意○諭大學士等聞福建百姓聚集數千在泉州所屬地方搶奪食物奔入山中提督藍理三路率兵進剿一路兵少爲折挫如果有所獲藍理必早已奏報矣此事督撫提督等俱未奏聞將軍祖良璧雖大畧奏聞亦不明白朕乃得之傳聞者其賊盜各處所貼揭帖朕亦得之揭帖內稱皇上以我等閩省老幼如同赤子恩養屢次豁免錢糧又截漕由海運而至欲令賑濟乏食之民闔省老幼子女無不感激歡躍但地方官員負皇上

之恩不曾施及百姓故我等窮民窘於衣食不得已而爲此若各處富戶不將屯積米石糶賣我等必搶奪等語去年朕一聞福建饑荒卽命截漕三十萬石賑濟差去大臣及地方官以三十萬石太多十五萬石卽足因止存留十五萬石想此米俱散給兵丁未必散給百姓所以無甚裨益若果截留三十萬石米運去民食充足於地方必有裨益也伊等原非賊盜因年歲歉收乏食不得已行之耳若卽出官兵征勦未免又生一事朕意遣部院大臣侍衛往行招安卽可平服如此則人民不傷亦不至有害地方著問九卿詹事科道具奏又諭藍理人材壯健而居官甚劣剋扣兵丁錢糧故地方官兵俱怨卽伊同鄉人無有不言其貪者前任總督梁鼎來京朕言藍理人材壯健梁鼐奏稱地方大吏必實心效力爲國愛民方於事有益藍理人材雖壯健然負皇上擢用之恩剋扣

兵丁錢糧有害地方扼腕陳奏在朕前幾致失儀由此觀之藍理居官貪劣已極藍理爲遊擊時因剋扣兵丁錢糧曾拏問革職因伊在朕前數次跪請進剿臺灣海賊贖罪始發往效力後累加擢用授爲福建提督伊當思朕洪恩改悔前非乃仍然不改以致人含怨可見貪婪成性之人冀其改移誠難事也○增貴州黎平府屬西山汛守備一千總一把總二兵丁三百名○辛亥以巴格爲內閣學士由內閣侍讀學士遷○丙辰吏部以大學士張玉書員缺奏請補授得旨張玉書病故未久此本著暫收貯其大學士員缺俟回鑾後再奏大學士李光地見在患病原任大學士陳廷敬係年老告休令暫到衙門辦理事務○增鄉試五經中式額數順天二名各省俱一名會試二名

六月己未朔差戶部左侍郎張世爵侍衛巴亥賴希等前往福建

招安泉州山寇○癸亥諭大學士等趙申喬奏請河南漿澤縣水衝地畝錢糧應行蠲免從來河流原無一定如河水遷流南岸則北岸地畝涸出河水遷流北岸則南岸地畝涸出地方官但將衝潰地畝錢糧奏請豁免其衝後涸出地畝並無一人奏聞者此等處朕非不知但未肯深究耳觀趙申喬此奏必係與河南巡撫鹿祐有隙藉之以辱鹿祐且欲使人皆懼彼之意不知人有懼彼者亦有不懼彼者苟係誠心爲國之人又何他懼哉凡人於事貴於中正和平能合乎中卽是合理朱子曰所謂中者在在皆有如房室有房室之中庭院有中庭之中牀有牀之中惟中爲難得得中則諸德悉備矣○戊辰設廣西西隆州儒學撥武緣縣訓導一移駐西隆州專司督課○己卯諭大學士等據浙江福建總督范時崇等奏山寇盡皆平服著速行文差往招撫官員令其回京

東華錄

康熙八十八

臣王先謙敬編

臣周潤藩恭校

秋七月庚戌諭大學士等張鵬翮趙世顯任總河以來河工底績
今由水路行者不復聞有涉險之艱于成龍任總河時朕南巡自
清口步行十餘里將應修築處皆釘椿標記朕回鑾後于成龍竟
不修築故致河道大壞爲此朕將于成龍帶去司官赫碩色擬成
死罪後授張鵬翮爲總河朕諭之曰爾但遵朕訓諭而行儻有差
誤朕不汝咎張鵬翮照朕指授修築故今河工底績更無可虞之
處○辛亥以葉九思爲戶部左侍郎由安徽巡撫遷○移温州府城守副
將駐防嘉興府嘉興府左營守備駐防海鹽縣改嘉興府遊擊爲
温州府城守遊擊温州府中軍都司爲中軍守備○丙辰 上行

圍發熱河

八月辛酉調梁世勳爲安徽巡撫以陳元龍爲廣西巡撫

由吏部左侍郎

遷

○諭大學士等頃者梁世勳奏請復熱審減等例朕聽政多年

惟日孜孜期又安萬姓故凡發政施令務以真誠爲尙儻矜憫犯法之人博取虛名夏則遇熱而審冬則遇寒而審不時遣官恤刑將督撫審擬案件頻飭堂司官分行駁改則貽累於兵民官驛糜費於迎送饋遺互訐多端不知作何底止督撫之專責首在敦厚風俗導民於善不時訓飭有司簡清詞訟速結案件不因細事多繫無辜以致蕩析家貲逃匿流亡卽爲良吏雖不熱審亦無所害使不清本原不愛黎庶徒以熱審爲言則各省刑獄之事未至熱時而審結者甚多是有熱審之名而無其實益滋煩擾矣梁世勳不諳事體輕重冒昧具奏殊屬不合理應從重治罪但念伊係無

知陳奏姑從寬免又諭曰太平之時不宜屢赦罪犯執法之人若將不應宥之人宥之則奸徒逞欲怙惡不悛矣○福建陸路提督藍理奏福建所屬永春德化二縣交界地方有盜首陳五顯等偪勒愚民二千餘人入夥搶奪百姓拒敵官兵臣令參將尙之璫統領官兵往緝兩次遇敵殺賊八十餘人中傷脫逃者不計其數盜黨張辰王富蘇標俱已投到其附近賊巢村民仍不廢耕織照常安業惟陳五顯脫逃俟拏獲正法得旨督撫提鎮等平日不能撫恤百姓訓練兵丁及有事又不能相機速行勦撫縱容盜賊滋蔓騷擾地方肆行搶奪且遲延日久不將其事奏聞乃稱百姓不廢耕織照常安業夫強盜竊盜多至三四十人百姓尙畏懼逃避况數千民人爲盜搶奪豈得謂百姓不廢耕織安居樂業乎此係伊等掩飾已過希圖卸罪巧行誑奏著該部嚴察議奏○庚午 高

宗純皇帝生○癸酉轉吳一蜚爲吏部左侍郎調胡會恩爲吏部

右侍郎

由禮
右調

○以王原祁爲翰林院掌院學士兼禮部侍郎

由詹
事遷

○庚辰

上駐蹕鄂爾楚克哈達是日以獲大鹿十一隻船廠佐

領那柳不勝驚異奏曰臣生長本地丁巳獲十一鹿者臣實未經

見真神奇也

上曰朕從來哨鹿行圍多所殺獲何神奇之有○

壬午以胡作梅爲禮部右侍郎

由內閣
學士遷

○予故戶部左侍郎張世

爵祭葬○乙酉禮部議准江南學政張元臣奏子游在聖門十哲

之列其後裔世居常熟縣請照閔子子貢例世襲五經博士從之

九月己丑賜來朝外藩鞍馬銀幣及隨圍官兵銀布○辛卯

上

還熱河○壬辰兵部議覆福建陸路提督藍理係封疆大臣縱容

盜賊滋蔓搶奪擾民不能招撫又遲延日久不行奏聞反巧行粉

飾誑奏應革職交刑部治罪總督范時崇巡撫黃秉中漳州總兵

官許鳳汀州總兵官陳有功照溺職例俱革職得旨監理前奏福建水師提督有吳英陸路提督有臣料理地方可保甯謐儻猶有盜賊之事臣無面目再覲天顏等語今盜賊竊發不能卽行剿撫縱容迄今尚未盡獲且居官不端殊爲溺職著革職從寬免交刑部范時崇黃秉中許鳳陳有功俱從寬免革職著各降五級戴罪圖功盜賊務令盡行拏獲如不能盡行拏獲再加議罪○戊戌設四川新撫土官宣慰使二宣撫使二安撫使七長官司五千戶二十一一百戶七十六○辛丑 上奉 皇太后回鑾○癸卯刑部議覆尙書蕭永藻察審四川加派一案原任布政使卞永式徵收錢糧每兩加派銀一錢二分除送原任四川巡撫能泰等銀二萬二百兩外共計入己銀二萬七千四百兩有奇應照律擬絞已經病故毋庸議能泰身爲巡撫屬官私派不行覺察又身受賄銀應照

例擬絞監候秋後處決從之○丙午停今年秋決○理藩院右侍

郎拉都渾緣事降調○戊申 上奉 皇太后還京師○甲寅以

博音岱爲理藩院右侍郎

由內閣學士遷

凌紹雯爲內閣學士

由少詹事遷

冬十月丙辰戶部議覆福建巡撫黃秉中奏臺灣府屬地畝向徵

稻穀並無額編銀兩其應徵本色稻穀請應一體蠲免查此項錢

糧該撫應於春夏開徵之前卽行奏請遲至秋季方行具奏應不

准行得旨臺灣府屬五十年應徵稻穀已經徵完在官雖蠲免於

小民無益其應徵康熙五十一年稻穀著行蠲免○刑部等衙門

奏太原府民陳四等鳩黨搶奪繞行陝西湖廣貴州等省一案應

將爲首陳四擬斬立決爲從陳六等三十六名及婦女三十六口

俱發往黑龍江給披甲人爲奴得旨陳四著卽處斬其餘犯及婦

女人口分別發往白都納甯古塔墨爾根黑龍江給披甲人爲奴

行文各該將軍嚴加拘守勿致脫逃如有二脫逃者卽行奏聞

上召三省原任督撫禮部尙書貝和諾刑部尙書齊世武郭世隆工部尙書陳詵左都御史趙申喬詰問縱容滋蔓陳四等情由各免冠引罪下部察議尋部議陳四等在湖廣藏匿巡撫陳詵不卽行緝拏縱往別省又在陝西行走巡撫齊世武並不查拏俱照溺職例革職湖廣總督郭世隆偏沅巡撫趙申喬照該管上司例各降四級調用雲南貴州總督貝和諾不行奏聞照例降一級調用其陳四經過府州縣各官應行文該督撫查參得旨陳詵齊世武俱降五級畱任郭世隆著革職趙申喬著降四級畱任貝和諾著降一級調用餘依議○丁巳以嵩祝爲禮部尙書由都統遷○戊午諭戶部前四十九年所頒諭旨原欲將五十年天下錢糧通行蠲免以諸臣集議恐需用兵餉撥解之際兵民驛遞益致煩苦故自

五十年爲始三年之內全免一週除將直隸奉天等九省康熙五十年地丁錢糧一概蠲免及歷年舊欠錢糧一併免徵外山西河南陝西甘肅湖北湖南各屬除漕項外五十一年應徵地畝銀共八百四十萬四千兩有奇人丁銀共一百二十萬八千一百兩有奇著察明全免並歷年舊欠共五十四萬一千三百兩有奇亦俱著免徵其康熙五十二年應蠲省分至期候旨行民間舊欠既經豁免嗣後每年額徵錢糧務如數全完儻完不及額或有虧空託稱民欠卽責令督撫以下官員償補仍從重治罪該督撫須實心力行期副朕惓惓愛民之意○辛酉卞永譽以病乞休允之調李旭升爲刑部左侍郎由工部左調○癸亥以馬良爲內閣學士由光祿寺卿遷○兵部奏福建臺灣總兵官崔相國調補三年任滿缺應另補上曰臺灣總兵官殊屬緊要應補之人著問九卿及福建省官員亦

遣人往問大學士李光地並曉諭福建總督等該省武官內好者
卽行薦舉勿致隱漏如果伊等據實具奏則福建省官員知賢否
皆能上達咸勉力相率爲好官矣如藍理兇惡盈滿朕始聞而褫
革之儻當伊罪惡未著之前先行罷黜於地方豈不更有裨益耶
定海總兵官吳郡居官甚優實心效力今署理江南提督事務江
南人亦皆稱道此人不可調補臺灣朕欲畱俟緊要處提督用之
著於列名應調補人內舉奏○江南正主考副都御史左必蕃奏
臣典試江南撤闈後聞輿論喧傳有句容縣知縣王曰俞所薦之
吳泌山陽縣知縣方名所薦之程光奎皆不通文理之人臣不勝
駭愕或係傳遞代作文字或與房官打通關節亦未可定祈將新
中舉人吳泌程光奎或提至京覆試或發督撫嚴訊以正國法而
肅科場至臣不能查出罪亦難辭得旨該部嚴察議奏○丁卯左

都御史趙申喬奏參翰林院編修戴名世妄竊文名恃才放蕩前
爲諸生時私刻文集肆口游談倒置是非語多狂悖今身膺恩遇
叨列巍科猶不追悔前非焚削書板似此狂誕之徒豈容濫廁清
華祈敕部嚴加議處以爲狂妄不謹之戒得旨這所參事情該部
嚴察審明具奏○辛未諭大學士等天文厯法朕素畱心西洋厯
大端不誤但分刻度數之間久而不能無差今年夏至欽天監奏
聞午正三刻朕細測日影是午初三刻九分此時稍有舛錯恐數
十年後所差愈多猶之錢糧微塵杪忽雖屬無幾而總計之便積
少成多此事實有證驗非比書生作文可以虛詞塞責也○轉阮
爾詢爲工部左侍郎以劉謙爲工部右侍郎由通政使遷○乙亥以李
必爲廣西布政使由雲南按察使遷○九卿遵旨議奏直隸各省生員舉
人額數屢增赴考士子較前倍眾因揭曉期迫考試官不能細心

徧閱草率錄取以致遺失佳卷嗣後會試揭曉寬於三月十五日
內鄉試揭曉大省寬於九月十五日內中省寬於九月初十日內
小省寬於九月初五日內直隸江南浙江鄉試人數倍於他省照
會試例加用房官二員限期既寬主考官之薦卷亦令徧閱庶不
至遺失佳卷從之○丙子貴州布政使張建績緣事革職○刑部
等衙門議覆大理寺卿張志棟等察審浙江督糧道程鑾私改折
漕一案應將程鑾照例革職未免平糶米銀著落程鑾及原任浙
江巡撫今調福建巡撫黃秉中賠補運官李斌等欠平糶米腳價
銀兩亦著落程鑾追還交倉儻有不敷仍在程鑾黃秉中名下追
補至黃秉中照程鑾所詳批行不行奏參顯係通同作弊黃秉中
亦照例革職從之○丁丑江蘇巡撫張伯行奏今歲江南文闈榜
發後議論紛紛於九月二十四日有數百人擡擁財神直入學宮

口稱科場不公臣不敢隱匿相應奏明得旨該部嚴察議奏○戊寅諭禮部朝鮮國王李焞自襲爵以來慎守封圻恪遵儀度歲時貢獻方物克殫惻忱四十餘年未嘗少懈其國中之事稍有關係者必奏明仰請定奪罔敢隱諱每於欽差人員竭盡小心倍加敬禮且撫恤國人善於愛養所屬靡不悅服朕用是深爲嘉美旣嘗曲示恩誼值彼地饑饉又自海洋運米賑濟故舉國人眾至今猶深感戴朝鮮貢物朕屢次裁減以至甚輕但國小地隘其年例貢物內有白金一千兩紅豹皮一百三十二張猶恐艱於備辦嗣後將此二項永停貢獻又聞朝鮮國使沿途館舍盡皆傾圯難以止宿歷年進貢奏事人員甚爲勞瘁著令各該地方官修葺堅固用副朕加惠遠人至意○庚辰諭八旗及部院衙門大臣各將灼知確見大臣以下閒散人以上篤行孝義者署名保奏雖本旗無有

別旗有之願保奏者亦著保奏如大學士溫達尙書穆和倫富甯安之孝不但眾人俱知卽朕亦深知之孝者百行之首果有篤行孝義之人爾等不可謂無由得知也○以綽奇爲福建巡撫

曲左都

御史

○辛巳諭大學士等今年秋審人犯較之往年大減自康熙

十三年以來奏章一日至二百餘件今亦大減於前矣○甘肅布政使阿米達丁母憂命回旗守制○壬午 上御暢春園召入諸王大臣等諭曰今諸大臣有爲皇太子而援結朋黨者諸大臣皆朕擢用之人受恩五十年矣其附皇太子意將何爲也此事惟鄂繕知之遂召出都統鄂繕及尙書耿額齊世武問之鄂繕叩首奏曰臣蒙 皇上綦養擢用厚恩若果知此豈敢隱諱耿額奏曰臣實不知知之敢不陳奏齊世武奏曰臣於各處並不行走此事誠不知也 上曰朕聞之久矣因訪詢未得其實故遣人追問都圖

云今有人首告供出爾黨爾據實奏聞不然將爾族誅所以都圖俱開寫陳奏矣遂出都圖所奏摺又將包衣達張伯良縛出令其在副都統內認看召出副都統悟禮問張伯良曰實有此人乎張伯良奏曰是實 上問張伯良曰有楊岱乎張伯良奏曰有一年老都統 上問都統迓圖曰爾知鄂繕行事否迓圖奏曰鄂繕在眾前常言感激 皇恩欲行效力其曖昧事臣不得知又問曰有汝否迓圖奏曰無 上顧鄂繕曰朕不得實據豈肯屈無辜之人爾等謂朕年高邀結黨與肆行無忌今在朕前爾等能行何事且有何顏面仰視天日諸臣等不入爾黨者甚多爾等視之甯不愧乎悟禮奏曰臣蒙 皇恩授爲副都統又身係宗室豈肯行此等事臣居宅與鄂繕宅近鄂繕曾具酒食延臣是實並無與伊等結黨之處齊世武奏曰臣性不能取悅於人素無朋友久在 皇上

洞鑒之中不知都圖爲何仇憾扳臣此等之事臣並不知惟有鄂繕延臣用飯一次臣亦延鄂繕用飯一次若果結朋黨自當族誅上曰爾云各處俱不行走爲何又供出彼此延請之事齊世武奏曰鄂繕之母係佟氏以舅呼臣故有彼此延請之事上曰齊世武乃最無用之人犬豕不如伊等將如此齷齪之人援入黨內有何益處又指耿額曰耿額乃索額圖家奴在烏喇時諂媚索額圖饋送禮物於索額圖案內卽應誅戮朕特有之今乃負恩造謀結黨伊等所行皆由於耿額耿額叩首奏曰臣蒙皇上隆恩苟有此事卽當凌遲上曰索額圖之黨竟不斷絕俱欲爲索額圖報復豈伊等祖父皆索額圖之奴僕乎此事正黃旗大臣無不知之又指鄂繕顧諸王曰曩者鄂繕自謂爲郭爾羅氏欲入朕之旗分內朕不俞允隱之至今未一明言伊並不思朕之恩德反結朋

黨妄行洵不肖之人也又諭曰凡人有所甚愛之子亦有所不甚愛之子奴僕中有親近用之者亦有不親近用之者爲人子爲人奴僕豈可不安分而妄行乎以酒食會友有何妨礙此不足言伊等所行者不在乎此夫效力者在行間用命方可謂之效力如都統能操練旗兵護軍統領能訓練護軍前鋒統領能訓練前鋒文臣能潔己辦事此可謂之效力伊等欲因皇太子而結黨者何也皇太子朕之子朕父子之間並無他故皆伊等在其間生事耳此等小人若不懲治將爲國之亂階矣伊等著監禁在宗人府都圖不久卽到俟其到時卽行質審鄂繕耿額齊世武悟禮著鎖拏○以遲斫爲貴州布政使由湖北按察使遷段志熙爲雲南按察使由江西驛鹽道遷○甲申福建巡撫綽奇未赴任丁父憂命仍畱左副都御史原任○乙酉賜八旗步軍白金

十一月丙戌朔禮部議覆江南科場一案應行文該督撫將舉人
吳泌等解京請旨覆試如果文義不通即將情弊嚴審究擬得旨
這事情著張鵬翮會同江南江西總督江蘇安徽巡撫在揚州地
方徹底詳察嚴加審明具奏左必蕃趙晉俱著解任發往質審○
以殷特布爲兵部尙書由左都御史遷哈山爲刑部尙書由吏部左侍郎遷○丁
亥以牟欽元爲湖北按察使由山東東兗道遷○戊子以覺羅滿保爲福
建巡撫由內閣學士遷○壬辰以吳一蜚爲刑部尙書由吏部左侍郎遷滿篤爲
左都御史由兵部左侍郎遷廖騰燧爲左副都御史由奉天府府尹遷二郎保爲
內閣學士由內閣侍讀學士遷調孫柱爲吏部左侍郎由盛京工部調○乙未諭大
學士等 天壇大祭朕親行禮曾有諭旨嗣因朕躬少有違和大
臣等再行奏阻故下旨遣大臣恭代朕則照常齋戒兩日來朕躬
安好如常必親祭方展誠心朕仍親詣行禮大臣等不知朕意或

又行奏請朕今年六十行禮時兩旁人少爲扶助亦可爾等卽傳

諭該衙門知之○轉胡會恩爲吏部左侍郎調李旭升爲吏部右

侍郎由刑部調轉覺和托爲兵部左侍郎以巴顏柱爲兵部右侍郎由內閣學士遷

○以貝和諾爲盛京工部侍郎降調尙書○庚子以傅爾笏納爲

內閣學士由內閣侍讀學士遷○辛丑上謁陵啟鑾○丁未上詣

暫安奉殿孝陵至仁孝皇后孝昭皇后孝懿皇后陵奠

酒○癸丑上駐蹕熱河○福建浙江總督范時崇奏海賊陳五

顯投誠○江南江西總督噶禮奏參江蘇按察使焦暎漢貪黷性

成蔑視民命巧詐欺飾命革職提問○乙卯禮部議准左都御史

趙申喬奏直隸各省寺廟常窩藏來歷不明之人行不法之事嗣

後請除原有寺廟之外不許新建將見在寺廟居住僧道查明來

歷令按季呈報甘結不准容畱外來可疑之人如事發將該管官

員照例處分得旨依議近見直隸各省勦建寺廟者甚多建造寺廟則占踞百姓田廬既成之後愚民又爲僧道日用湊集銀錢購買貧人田地給與以致民田漸少且游民充爲僧道窩藏逃亡罪犯行事不法者甚多實擾亂地方大無益於民生者也著各省督撫及地方官除原有寺廟外其勦建增修永行禁止○以折爾金爲甘肅布政使由宗人府理事官遷○丙辰 上命大學士等傳問九卿編修楊緒爲人如何九卿等奏曰楊緒爲人不端 上諭曰楊緒著革職驛解回籍交與地方官嚴禁在家勿令擅出行走更生事端翰林官員內尙有如此等人亦著九卿舉出尋九卿等舉出侍講錢名世修撰王式丹編修賈國維賈兆鳳四人具奏得旨翰林官理當安靜守分錢名世王式丹賈國維賈兆鳳行止不端聲名不好俱著革職

十二月癸亥禮部奏康熙五十年湖廣鄉試少中舉人十名應將

提調布政使張聖猷等一併發往以備質審得旨此案著交與張

鵬翮審明具奏介孝琰劉儼亦著發往質審○庚午以李錫爲湖

北布政使

由貴州按察使遷

○癸酉

上還京師

○甲戌以盧詢爲江蘇

按察使

由四川建昌道遷

○是月免安徽六安壽州鳳陽等八州縣衛旱

災額賦有差○是歲朝鮮琉球來貢○人丁戶口二千四百六十

二萬一千三百二十四田地山蕩畦地六百九十三萬三百四十

四頃三十四畝有奇徵銀二千九百九十萬四千六百五十二兩

八錢有奇米豆麥六百九十一萬二千二百五十四石有奇草四

百八十五萬五千四百六十一束茶二十一萬五千二百一十五

引行鹽五百九萬一千六十九引徵課銀三百七十二萬九千二

百二十八兩有奇鑄錢三萬七千四百九十三萬三千四百有奇